

籌辦夷務始末

卷九之十

籌辦夷務始末卷之九

道光十九年己亥十二月癸亥。

諭內閣。鄧廷楨著調補兩江總督。兩廣總督著林則徐調補。

甲子。新調兩廣總督林則徐。兩江總督鄧廷楨奏。英咭喇國貨船。於九月底。正在具結進口。旋被該國兵船二隻。攔阻滋擾。我兵水陸疊擊。將該兵船及尖沙背各夷船。盡行逐出外洋。經臣等於十月十六日。恭摺具奏在案。嗣准軍機大臣字寄。九月二十三日。奉

上諭。前後駛回各船。難保不潛赴東西兩路。冀圖私銷。著即派員跟蹤偵察。嚴飭沿海各營。認真防範。至所出切結。如果可靠。自

必漸就肅清。儻該夷迫於勢感。暫作緩兵之計。日後再有反覆。即當示以兵威。斷絕大黃茶葉。永遠不准交易。俾冥頑之徒。知所儆懼等因。欽此。臣等跪讀之下。仰見我

皇上料夷情之反覆。

示儆懼於冥頑。

訓諭周詳。彌深欽服。

臣等先於收繳煙土事竣。當以此後不許

夷人再賣鴉片。理應取具遵依。是以飭繕甘結。聲明如有

夾帶鴉片。人即正法。貨物沒官字樣。義律先本抗違。迨數

月相持。屢經折挫。八月內始據稟稱情愿具結。惟所寫字

樣尚與新例不符。臣

等念其畏罪輸誠。冀可再加開導。是

以其原遞澳門同知說帖。繕錄奏

聞。詎該夷陽奉陰違。早不出

聖明所料。至九月間。義律復招夷商數人。在澳門集議。彼此推卸刁難。此即反覆之始也。該國有嘮喇噹啣二船。均遵式具結。嘮喇先進黃埔。而噹啣船正在入口。被義律潛約吐啞兵船。將其攔回。以致與師船互相礮擊。其為反覆莫甚於此。且前述說帖內云。毆斃林維喜命案。兇手已懸賞二千圓。令人報知。至九月底。乃將囚禁之在船夷人五名。均欲解回該國。照夷例辦理。是其反覆之形不一而足。而究其反覆之故。實因慣賣鴉片。奸夷利心不死。前雖已將新煙

帶回夷埠而往來夥黨尚多。仍思乘機偷運。恐甘結一具。性命難逃。而義律利其抽分。與之朋比。忽恭忽倨。皆有誦謀。臣等前已傳諭諸夷。奉法者來之。抗法者去之。暎夷既不遵約束。與其開門而揖盜。何如去茅以安良。茲蒙

訓諭嚴明。尤當恪遵辦理。當商粵海關監督。臣豫堃會同出示曉

諭。自十一月初一日起。停止暎咭喇國貿易。除未經停止以前。暎夷有將貨船轉賣與別國夷商者。既據遵式具結。查無鴉片。即係正經貿易。業已移步換形。尚可不追既往。當與嚮喇等一體准令進口外。其餘責成洋商。認明暎國來船。一概停其交易。所有大黃茶葉二物。查大黃每年出

口。本屬有限。不過附搭藥材項下。暎夷所銷尤少。惟茶葉在所必需。然有綠茶黑茶之分。暎夷所銷多係黑茶。現在嚴密稽察。不使影射偷漏。查向來夷船到粵。以暎咭喇為最多。自嚴辦鴉片以來。各夷埠均有傳聞。以鴉片出自暎國。此後該國買賣可減。別國買賣可增。如噠國。瑞國。及單鷹。噠。啞。啞。等國。歷年不過偶來一二船。本年來者特多。是他夷皆有欣欣向榮之象。而咪喇啞國之船。現來四十五隻。則比往居全年之數。已有浮多。尤見

天朝聲教覃敷。並不少此。啞咭喇一國。而義律之勾結吐噠等。虛張僑飾。玩法營私。該國以七萬里之遙。其主若臣。未必

周知情狀。今他國通商如舊。而暎國獨停。若該國查察情由。係因圖賣鴉片。抗違

天朝新例。則內而自知理曲。外而顏面何存。彼亦不肯容義律等之詭計奸謀。以自壞其二百年來之生計也。伏思斷絕鴉片。首貴杜其來源。而杜源總在夷船。無他謬巧。本年以來。收繳已化之煙土。值銀千餘萬兩。人所共知。而新來之鴉片。半途聞信折回。及到粵。畏拏運回者。訪聞亦復稱是。故本年暎夷來船。本較往年為少。今既發令斷絕該國貿易。所有洋商行鋪。均不敢與之私售。惟當視其有無悔懼真情。再行覈辦。至他國遵照具結進口。查無鴉片者。已有船六十

二隻。並據查報帶來洋錢。將及二百萬圓。臣等仍當時刻
稽查。防其潛代。暎夷走私偷賣。不敢因他夷之遵式出結。
即遽信為無他。其先已具結之噹啣一船。雖係暎國夷人。
而早知遵循法度。現被義律等扣留口外。日後若求入口。
仍當帶進黃埔。不宜與觀望營私他船。一例辦理。以示區
別。至前後駛回各船。誠難保不潛赴東西兩路。希冀私銷。
臣等仍遵

諭旨。密派文武。跟蹤偵察。並嚴飭沿海各營。認真防範。總期該夷
鴉片無處可售。庶使海面肅清。以仰副

聖主除患保民之至意。

諭軍機大臣等。前據林則徐等奏明轟擊夷船情形。曾經降旨飭令將該國船隻。盡行驅逐。絕其貿易。並諭以區區稅銀。何足計論。想已遵辦。本日據林則徐等奏。察看暎夷反覆情形。一摺。覽奏均悉。該夷反覆無常。早已洞見。現當嚴禁鴉片。豈容該奸夷陽奉陰違。希圖影射。著林則徐仍遵前旨。凡係暎咭喇夷船。一概驅逐出境。不准逗留。惟各國恭順。照常通商。難保該夷不潛行偷漏。滲入他國。私帶煙土。妄冀銷售。即大黃茶葉。亦恐他國加倍購買。轉相付給。是名為禁止。英國貿易。而流弊益多。殊非覈實辦理之道。著林則徐即將種種弊竇。籌畫堵塞。其當啣一船。毋須招令入口。以歸畫一。林則徐現已簡調兩廣總督。責無

旁貸。務當趁此警動之機。為一勞永逸之策。至於區區關稅之盈絀。朕所不計也。

癸酉。順天府府尹曾望顏奏鴉片流毒中外。幾於不可救藥。仰賴我

皇上乾綱獨斷。

飭部臣議立重典。各督撫盡力按拏。一年以來。內地民人咸知警畏。現在戒除者十已八九。又

特命

欽差大臣。馳赴廣東查辦海口。初至之日。夷人震懾。天威。呈繳煙土二萬餘箱。出具不敢再來甘結。似該夷亦甚恭順。

當無意外之患矣。乃臣聞喫咭喇夷目義律於本年各國新來之船。攔截外洋。有煙土者不令呈繳。且時以兵船入內洋游奕。敢與官兵接仗。是該夷前此出具甘結。祇係具文。其意實希圖掩飾一時。俟

欽差大臣離粵之後。仍載煙土來與內地奸民售賣。其詭詐已可概見。迨見查禁嚴緊。煙土不繳。不准入口。彼遂肆其狂悖。不遵約束。竟敢放礮傷我弁兵。其罪已不容誅。然聞其貨船數十號。猶在外洋之尖沙嘴停泊。觀望不去。彼其意謂粵海關稅百數十萬。料在事諸臣將必顧惜

國課。或可委曲相從。不知我

天朝富有四海。物產豐饒。豈藉該夷區區之稅以資用。惟該夷
所需以為命。不可一日缺者。乃中國之大黃茶葉。臣愚以
為今日要策。首在封關。無論何國夷船。概不准其互市。彼
百數十船載來之貨。久不能售。其情必急。而禁絕大黃茶
葉。不令商民與之交易。更有以制伏其命。彼未有不懼而
求我者也。或謂奸夷蓄謀已久。大黃茶葉。其從前運去者。
足資十餘歲之用。不知大黃或尚可久藏。若茶葉存至二
三年。未有不洩氣微變而不可用者也。或又謂不遵約束。
止啖咭喇夷人。其他國夷船。尚可准其互市。不知夷船販
運鴉片。無國無之。若聽他國夷船互市。安知其不將載來

煙土寄頓啖咭喇船內。如從前零丁洋寄頓躉船之故習。而載彼貨入口。載我大黃茶葉出口。安知其不為啖咭喇轉運手。應請

皇上明降

諭旨。凡有夾帶鴉片夷船。無論何國。不准通商。俾中外臣民咸曉。然於

聖意所在。務絕鴉片來源。力除錮習。區區關稅。固不難悉予豁除也。關既封矣。然使海禁不嚴。則關猶不封也。臣聞沿海各省洋面。盜賊未盡肅清。而廣東向有一種快蟹船。專務走私。當華夷通商之日。該匪等尚敢肆行無忌。近聞查拏

鴉片嚴緊。亡命之徒。率皆駕駛快蟹船。出洋搶劫客商。私載米麵。接濟奸夷。若不亟為勦滅。則該匪等將為奸夷所誘。悉聽其用。釀成大患。應請

旨飭下廣東。福建。浙江。江蘇。山東。奉天。各督撫將軍提督。嚴飭舟師。務先將海盜勦捕盡絕。一面揀派鎮道大員。嚴查海口。除口內往來船隻不禁外。其餘大小民船。概令不准出海。即素以捕魚為生者。亦止許在附近海內捕取。僅查有藉名影射。私行接濟夷船者。立拏正法。其弁兵得規包庇者。一體治罪。再查明沿海各山。有淡水可取之處。專派弁兵把守。不准夷船往汲。其近海村莊居民。令各團練鄉勇自

為防守。凡有夷人上岸。即行攻擊。有私通者。嚴治其罪。不獨廣東一省宜然。凡沿海各省。俱宜如此嚴密。則該夷接濟之路。既絕。樵汲又且不通。亦應悔罪而俯首聽命矣。儻猶觀望不服。敢於抗拒。彼所恃者。以其船身高大堅厚。礮火迅利。習慣重洋。我舟師遠出。勦捕恐不得力耳。不知該夷狡詐桀驁。平素藐視官法。不遵約束。粵省兵民久已志切同仇。人人欲得而甘心之。祇因歷任督撫。慮開邊釁。嚴禁兵民不准與較。遂隱忍以至今日。臣愚以為我主彼客。我船彼船。不必令舟師遠出。與之對仗。該夷既絕通商。又鮮接濟。勢不能久泊外洋。將必仍入內洋游奕窺探。我更

以舟師誘之使入。豫為召募能泅水而有膽力者數百人。使之夜間分隊潛往。直上其船。乘其不備。痛加勦殺。或豫設火船數百隻。亦令善泅水者。駕以乘風縱放。而以舟師繼之。並先示諭兵民等。有能擒獲夷船者。即將該船貨物全數給賞。則無不踴躍爭先。彼奸夷亦何所恃而不恐乎。可否請

旨飭下

欽差大臣。廣東督撫。相機而行。設法勦辦。該夷人當未有不懼而求我者也。然後察其果能誠心悔罪。再行奏懇。

天恩。准其通商互市。仍將大黃茶葉等貨。定為限制。無許逾額多運。以為箝制之法。儻再有夾帶鴉片。潛入內地。即一面照

新例懲辦。一面仍禁絕互市。庶以杜其覬覦之私。而永清積弊之源也。

曾望顏又奏。再查寄居香山縣屬澳門之西洋夷人。已二百餘年。世受

天朝撫綏。該夷止以貿易為生。別無產業。若因禁絕啖咭喇等國互市。並不准其通商。誠恐該夷無以為生。非所以示體恤。若漫無限制。又難保其不為奸夷販運。應請自今以後。所有澳夷互市貨物。亦定以限制。不准逾額。如查該夷現有與各外夷私運接濟情弊。立將澳門商民撤退。概不准其互市。臣再思將來善後事宜。啖咭喇等國夷人。果其悔